



САНХҮҮГИЙН НЭГДЭЛ

ҮЙЛ АЖИЛЛАГААНЫ ТАЙЛАН

MSE: 

Агуулга

Гүйцэтгэх удирдлагын тайлан

Эрхэм зорилго

Алсын хараа

Мөрдөх зарчим

Давуу шинж чанар

Компанийн тухай

2020 оны онцлох үйл явдал

Хувьцаа эзэмшигчдийн бүтэц

Төлөөлөн Удирдах Зөвлөл

Хувьцаа эзэмшигчдийн хурал, ногдол ашиг

Удирдлагын баг

Эдийн засгийн орчин

Мөнгө, санхүү

Хөрөнгийн зах зээл

Валютын зах зээл

Гүйцэтгэлийн тайлан

Үйл ажиллагааны гүйцэтгэл

Эрсдэлийн удирдлага

Хөрөнгө оруулалтын багц

Хараат бус аудитын тайлан

Гүйцэтгэх удирдлагын тайлан

Сайн байна уу, сайн сууж байна уу, та?

Уламжлал ёсоор шинээр гарсан Цөөвөр хэмээх Цагаагчин Үхэр жилийн эхний улиралд Компанийнхаа жилийн тайланг, хувьцаа эзэмшигч танд хүргэнгээ мэндчилж байгаадаа баяртай байна.

Өнгөрөгч 2020 онд дэлхий даяар коронавирусын цар тахал дэгдсэний улмаас улсын хил хаагдаж, бүх нийтээрээ хөл хорионд орж, төрөөс онцгой дэглэмд шилжин бид бүхний сурсан, дассан бүх зүйл өөрчлөгдөж, амьдралын хэв маяг, нийгмийн харилцаа орвонгоороо эргэсэн урд өмнө тохиолдож байгаагүй онцгой үйл явдлуудаар дүүрэн жил боллоо. Төр засгаас иргэдийнхээ аюулгүй байдлыг хангах, орлогын эх үүсвэрийг тасалдуулахгүй байх тал дээр анхаарч ажилласан ч ард иргэдийн хувьд ч, бизнесийн байгууллагуудын хувьд ч онцгой хүнд нөхцөл байдалд ажил, амьдралаа залгуулан ажиллалаа. Олон ч компани зах зээлгүй болсон тул үүд хаалгаа барьж,

ажилчдаа цомхотгон бүтээгдэхүүн, үйлчилгээгээ таг зогсоох байдалд хүрсэн харамсалтай үр дагавар нийтлэг байв.

Харин Хөрөнгө Оруулагч Үндэстэн хөдөлгөөний гишүүн таны хөрөнгө оруулж, хамтдаа байдаг Ард Санхүүгийн Нэгдлийн хувьд бүхий л ажлаа эртнээс цахимжуулж, салбаргүй, цомхон чадварлаг бүтэцтэй ажиллаж ирсний хувьд өнгөрсөн жил нийтлэг хандлагыг сөрөн зах зээл дээрх байр сууриа өсгөж, тэлсэн, олон шинэ үйлчилгээ, бүтээгдэхүүн нэвтрүүлсэн, ололт амжилтаар богцоо дүүргэсэн он жил боллоо. Манай хувьцаа эзэмшигчид хуулинд заасан хугацаанд хурлаа цахимаар зохион байгуулсан бол хил хаагдсаны улмаас миний бие гадаадад гацсан байгааг ашигтайгаар эргүүлж, Хөрөнгө Оруулагч Үндэстэнг цогцлоох зорилгынхоо хүрээнд би гэр бүлийнхээ хамтаар Европод, харин манай багийнхан Монгол даяар бүтээгдэхүүн үйлчилгээгээ таниулан сурталчилж, шинэ хэрэглэгчдийг олноор татаж чадлаа. Монголын хамгийн



анхны хаалттай хөрөнгө оруулалтын сан болох Үндэсний Хувьчлалын Сан IPO-гоо амжилттайгаар хийж, үйл ажиллагаагаа эхлүүлэв. Манай баг Ард Аппын 4 дэх хувилбарыг боловсруулан Digital Assets Exchange буюу Виртуал Хөрөнгийн Бирж (DAX.mn) болох блокчэйн технологид суурилсан крипто, секюрити токен арилжаалах платформоо олон нийтэд танилцуулахад бэлэн боллоо. Монгол Шуудантай хамтран бид EuroGiro хэмээх олон улсын мөнгөн гуйвуулгын сүлжээний үйлчилгээг нэвтрүүлж эхлэв. Олон жилийн хугацаанд төлөвлөгдсөн Монгол ТВ-ийн Аппрентис Монгол Шоу олны хүртээл болсон бөгөөд гарсан өдрөөсөө эхлэн үзэгч түмний таашаалд нийцэж, бизнесийн менежмент, маркетинг, санхүүгийн боловсролыг түгээхэд их ач холбогдолтой нэвтрүүлэг боллоо.

2020 оны эхэнд Монголын Хөрөнгийн Биржийн ТОП-20 индексийн сагс шинэчлэгдэж, Ард Санхүүгийн Нэгдэл болон түүний хөрөнгө оруулалттай 3

компани багтсан юм. Тус индекс нь өмнөх ондоо хамгийн ихээр арилжаалагдсан компанийн хувьцааг онцгойлдог үзүүлэлт билээ.

Ард Санхүүгийн Нэгдэл (AARD), Ард Даатгал (AIC), Ард Кредит (ADB), Ард Лайф ХХК, Ард Актив ХЗХ, Үндэсний Хувьчлалын Сан (ХОС) 2021 оны 1 сарын 22-нд санхүү, үйл ажиллагааны тайлангаа урьдчилсан байдлаар хөрөнгө оруулагчиддаа танилцуулсан билээ. Ард Холдингс тайлант хугацаанд 0.2 тэрбум, Ард Даатгал 2.10 тэрбум, Ард Кредит 2.1 тэрбум төгрөгийн нийт ашигтай тус тус ажиллалаа. Ард Кредитын хувьд 467.7 мянган ширхэг зээлийн хүсэлт хүлээн авснаас 48.6 мянган зээлдэгчдэд 42.1 тэрбум төгрөгийн зээл олгож ажилласан байна. Харин Ард Даатгалын нийт хөрөнгө 28.8 тэрбум төгрөгт хүрч, 15.7 тэрбум төгрөгийн хураамжийн орлого төвлөрүүлэн ажиллалаа. Ард Лайфын харилцагчдын тоо 10,000-ын босгыг даван, хөрөнгө оруулалтын ашиг өмнө жилийнхээс 1.6

тэрбумаар өсч 2.7 тэрбум төгрөг болсон байна.

Ард Активын хөрөнгө 66 хувиар өсч 6.9 тэрбумд хүрсэн бол Үндэсний Хувьчлалын Сан нь ард иргэдээс татан төвлөрүүлсэн хөрөнгөөрөө үйл ажиллагаагаа эхлүүлэн оны эцэст хөрөнгө оруулагчиддаа жилийн 25.6 хувийн өгөөжтэй ажиллаж чадлаа.

Гараа сайн бол бариа сайн гэдэг. Оны сүүлчээр Ард Апп хэрэглэгчдийн тоо 449,122 болж, 202 сая ширхэг АрдКойн урамшууллаар олгогдсон байна. Ард Шопын стратегийг шинэчлэх үйл явц эрчимтэй өрнөж, хөл хорионы үед харин ч бизнесээ Монгол Шуудангийн хамтаар эрчимжүүлээд авсныг дурдах хэрэгтэй болов уу?

Ковидын цар тахлын улмаас бизнесийн үйл ажиллагаа тасалдах эрсдэлтэй энэ үед Ард Санхүүгийн Нэгдэл болон түүний хөрөнгө оруулалттай компаниуд ногдол ашиг тараасан нь сонин содон бизнесийн шийдэл байсан бөгөөд Ард Кредит

1.18 тэрбум, Ард Даатгал 850 сая, Ард Санхүүгийн Нэгдэл 1 тэрбум төгрөгийг тус бүр хувьцаа эзэмшигчидтэйгээ хуваалцсан юм. Хүчтэй бөгөөд Хамтдаа байх уриандаа үнэнч байсныг энэ маань илтгэж байгаа болов уу? Итгэл хүлээлгэсэн та бүхэндээ баярлалаа!

Ард Академи ард иргэдийнхээ санхүүгийн боловсрол, бизнесийн мэдлэгийг тогтмол нэмэх зорилгынхоо хүрээнд харилцагч хэрэглэгчиддээ 7 хоног бүр хувийн санхүү, хөрөнгө оруулалт болон менежментийн сэдвийн хүрээнд мэргэжлийн хүмүүсээс ярилцлага авч, нийтлэл бэлтгэн хүргэхээс гадна цахим сургалт зохион байгуулж ирлээ. Бид одоогийн байдлаар нийт 38 удаа сургалтыг цахимаар болон танхимаар хийж, вэбсайтдаа нийт 136 нийтлэл оруулсан байгаа бол уншигчийн зүгээс 125,862 удаа орж уншихдаа 2,387 цаг зарцуулжээ.

Ард Санхүүгийн Нэгдэл нь нийгмийн хариуцлагын хүрээнд “Улаанбаатар-

Сонгдо" эмнэлгээс хэрэгжүүлсэн "Зүрх мартаггүй" төсөл, УОК-т дэмжлэг үзүүлэхээр МББСБХ-ноос санаачилсан хандивын аян зэргийг дэмжиж мөнгөн хандив өргөж оролцсон бол төр засгаас хэрэгжүүлсэн ажлын байрыг цөөлөх бус тогтвортой хадгалах бодлогыг дэмжиж, хэрэгжүүлж ажилласан болно. Манай бүх компаниуд татвар, шимтгэлээ цагт нь зөв тодорхойлж, төлж ажилладгаараа улсынхаа төсвийг бүрдүүлэхэд жил ирэх тусам улам том хувь нэмэр болж байгааг онцлох нь зүйтэй болов уу?

Ажил хийвэл ам тосдоно гэдэг - манай хувьцааны үнэ он гарсаар Монголын Хөрөнгийн Биржийн хамгийн өндөр өсөлтийг үзүүлж, 3 мянган төгрөгийн босгыг анх удаагаа давлаа. АрдКойны үнэ ханш ч өсч 30 төгрөгт хүрсэн нь бидэнд итгэж, бидэнтэй хамт олон жилийн туршид хүлээцтэй байсан та бүхэнд миний амлалт биеллээ олно, бид зөв зүг чигт явж байгаа гэдэг итгэлийг тань бататгасан болов уу? Энэ бол зөвхөн эхлэл гэдгийг санаарай - бид бүх Монголчууд хөрөнгө оруулагч болж, мөнгөө өөрийнхөө төлөө ажиллуулдаг болсноор санхүүгийн эрх чөлөөнд хүрч, өрх бүр орлого, амьжиргааны олон давхар хөдөлгүүртэй болох ёстой гэдэгт итгэдэг. Үүнийгээ ч гүйцэлдүүлнэ гэж зүтгүүлдэг.

2021 онд бид банкинд хөрөнгө оруулалт хийх болно. Нээлттэй хөрөнгө оруулалтын сантай болно. Тэтгэврийн шинэчлэлээ зүтгүүлнэ. Кредит картаа гаргана. Манай

даатгалын үйлчилгээ бүрэн цахимжина. Цахим биржээ төгөлдөршүүлнэ. АрдКойныхоо хэрэглээг нэмэгдүүлнэ.

Манай хэрэглэгчид 1 саяд хүрэх болно гэж тооцоолж байна. Та итгэлтэй байж болно. Би хэлсэн бол хийдэг. Энд одоогоор зарлаж болохгүй нилээд хэдэн ажил бас бий гэдгийг онцлон цохъё.

Мэдээжийн хэрэг ажил хийж байгаа юм чинь алдах тохиолдол гардаг аа. Замд давж туулшгүй мэт саад бэрхшээл тулгардаг.

Хөндлөнгөөс ч дайрч, дайрах болно. Гэхдээ бид хийж байгаа зүйлдээ төгс итгэлтэй байдаг учир бүх хүндрэл бэрхшээлийг ажралгүй даван туулсаар ирсэн. Бидний сэтгэлд зүрхэнд гал дүрэлзэж байгаа цагт бүхий л асуудлыг даван туулаад л явах болно. Үнэн ямагт ялдаг.

Бидний Ард Монгол юм.

2021 оны Цөөвөр Үхэр жил айсуй. Миний хувьд хөрөнгийн зах дээр Бух давхилаа гэж харж байгаа. Танд амжилт, аз жаргалыг хүсье! Мөнгөө өөрийнхөө төлөө ажиллуулах үйлсэд тань амжилт хүсье! Чоно шиг хийморьтой байгаарай! Хүчтэй. Хамтдаа!

Гүнээ хүндэтгэж, мэхийн ёсолсон, Ард Санхүүгийн Нэгдлийн Үүсгэн Байгуулагч, танай Гүйцэтгэх Захирал

Хутагт овогтой Чулууны Ганхуяг



Эрхэм зорилго

Хөрөнгө Оруулагч Үндэстэнг цогцлооно.

Алсын хараа

Бүс нутагтаа тэргүүлэгч финтек нэгдэл болох.

Мөрдөх зарчим

Хувьцаа эзэмшигчдийн эрх ашгийг дээдэлж ажиллана;

Ёс зүйн хэм хэмжээг өндөрт тогтоон дагаж, хууль тогтоомжийг чандлан мөрдөхийн зэрэгцээ хүйсийн тэнцвэртэй байдлыг хангаж ажиллана;

Хөрөнгө оруулалтын өгөөж, эрсдэлийн харьцааг зохистой түвшинд барьж ажиллана;

Сайн засаглал, ил тод байдлыг байгууллагын бүх түвшинд нэвтрүүлэн ажиллана;

Нээлттэй уян хатан бодлого баримталж, зах зээлийн мэдрэмжтэй, хурдан шуурхай ажиллахыг эрмэлзэнэ;

Шинийг нэвтрүүлж, манлайлах бодлогыг мөрдөж ажиллана;

Харилцагчийн үйлчилгээг дээд зэрэгт барих бодлогыг чандлан мөрдөнө;

Хамгийн авьяаслаг, хүчирхэг, мэргэжлийн, цомхон, үйл хэрэгтээ үнэнч хамт олныг бүрдүүлж ажиллах бөгөөд шинээр ажилд орох босгыг өндөрт тогтоож, ажлын байранд тавигдах шаардлага, хариуцлагыг чанд мөрдөнө;

Нийгмийн хариуцлага өндөртэй, нийгэмд эерэг өөрчлөлтийг түүчээлж ажиллана;

Хууль эрх зүйн болон бизнесийн орчиндоо шаардагдаж буй өөрчлөлтүүдийг бий болгохын төлөө санаачилга гаргаж ажиллана;

Байгаль орчин, эх дэлхийгээ хайрлан хамгаалах шилдэг стандартыг нэвтрүүлж ажиллана;

Бүтээгдэхүүн үйлчилгээндээ өөрсдийн итгэл үнэмшил, философийг шингээж ажиллана.

Давуу шинж чанар

Өрсөлдөх чадвар, үр ашиг болон дэвшилтэт технологийг цогцлуулсан түншлэл;

Амжилттай хөрөнгө оруулалтын туршлага, ил тод засаглал;

Шинэ санаа, төслийг хэрэгжүүлэгч олон улсад танигдсан хамт олон;

Хөрөнгө оруулалтын тогтвортой өгөөж;

Зах зээлийн боломжийг хөрөнгийн үнэ цэн болгох туршлага;

Хөрөнгө оруулагч үндэстний танигдсан брэнд;

Үндэсний хэмжээний цогц дэд бүтэц;

Энтрепренёр соёл.

Компанийн тухай

Анх 2000 онд Нэгдсэн Үндэстний Байгууллагын Хөгжлийн Хөтөлбөрийн Монгол дахь суурин төлөөлөгчийн газар болон АНУ-ын Мэрси Кор төрийн бус байгууллага ХасБанкны нийт ажиллагсдад зориулан 600 сая төгрөгийг ажиллагсдын хувьцаа эзэмшүүлэх санд хандивлах шийдвэрийг гаргасан юм.

Улмаар ХасБанкны ажиллагсад тус сангаас олгогдсон хувьцааны үнэ цэнийг өсгөх, хөрөнгө оруулалтаа нэмэгдүүлэх зорилгоор өөрийн хувьцаагаа ХасБанкны толгой компани болох ХАС-ГЭ ХХК-ийн хувьцаагаар солих байдлаар хөрөнгө оруулалт хийсэн болно.

ХАС-ГЭ ХХК нь тухайн үеийн удирдлагын шийдвэрийн дагуу ТэнГэр Санхүүгийн Нэгдэл ХХК болж өөрчлөгдсөн бөгөөд санхүүгийн үйлчилгээ үзүүлдэг томоохон компаниудын нэгдэл болж өргөжсөн юм.

Ард Санхүүгийн Нэгдэл нь ХасБанкны үүсгэн байгуулагч, одоогийн Гүйцэтгэх

Захирал Ч. Ганхуягийн санаачлагаар 2005 оны 9 сард Employee Investment Trust буюу ИАЙТи ХХК нэртэйгээр байгуулагдсан бөгөөд Монголын анхдагч институционал хөрөнгө оруулагчийн үндэс суурь ийнхүү тавигдсан түүхтэй.

ИАЙТи нь үүсгэн байгуулагдах үедээ нийт 1.2 сая төгрөгийн дүрмийн сантай, 10 хувьцаа эзэмшигчтэй байсан бол 2020 оны жилийн эцсийн байдлаар нийт 10,000 гаруй хувьцаа эзэмшигчтэй, 80.4 орчим тэрбум төгрөгийн хөрөнгөтэй болж өргөжсөн байна.

2013 онд манай гол хувьцаа эзэмшигчид шинэ стратегийн зорилгоо тодорхойлж, Ард Санхүүгийн Нэгдэл гэх нэрэн дор үйл ажиллагаагаа явуулах түүхэн шийдвэрийг гаргасан юм. Энэхүү төлөвлөгөөний хүрээнд бид Ард Кредит, Ард Даатгал, Ард Секюритиз, Ард Лайф болон Ард Активд тасралтгүй хөрөнгө оруулж эхэлсэн билээ.

2016 онд Ард Санхүүгийн Нэгдэл ХК нь Монголын Хөрөнгийн Бирж дээр болсон томоохон хувьчлалд амжилттай оролцож Монгол Шуудан ХК-ийн гол хөрөнгө оруулагч нь болж чадсан юм. 2017 онд манай үндсэн хөрөнгө оруулалтын багцад хөрөнгө оруулалтын сангийн удирдлагыг хэрэгжүүлэх Ард Менежмент, блокчэйн болон криптовалютын чиглэлээр ажиллах Ард Бит компаниуд нэмэгдсэн байна. 2018 оноос ТэнГэр Системс компани өөрийн үйл ажиллагааны чиглэлд шинэчлэл хийж, блокчэйн технологи руу шилжиж эхлэв.

2019 онд Ард Пропертиз, Ард Риэл Эстейт, Ард Лизинг, Ард Холдингс Интернэйшнл зэрэг компаниуд байгуулагдаж, нэгдлийн бүтцэд багтаж эхлэв.

Бид хүн бүр бүтээсэн баялгаасаа хувь хүртэх ёстой, харилцагч иргэн бүр банкныхаа эзэн нь байх ёстой гэсэн итгэл үнэмшилдээ хөтөлгөдөн 2015 онд Ард Холдингсыг хаалттай хувьцаат компани болгосон билээ. 2017 оны төгсгөлд Хөрөнгө Оруулагч Үндэстэн Жинст-Увс нээлттэй ХК-тай урвуу хэлбэрээр нэгдэж МХБ дээр арилжаалагдаж эхэлсэн бол 2019 оны 8 сарын 8-нд Ард Санхүүгийн Нэгдэл RTO хийснээр нээлттэй хувьцаат компани болсон юм.

2020 оны онцлох үйл явдал

1 сарын 13	Монголын Хөрөнгийн Биржийн ТОП-20 индекс шинэчлэгдэж, Ард Санхүүгийн Нэгдэл, Ард Даатгал, Ард Кредит болон Монгол Шуудан багтлаа.
2 сарын 12	Ард Секюритиз ҮЦК нь гадаад арилжаа эрхлэх тусгай зөвшөөрөл авлаа.
2 сарын 19	Ард Санхүүгийн Нэгдэл нийт ашгаасаа 18.35 хувь буюу 1 тэрбум, Ард Даатгал 49.45 хувь буюу 850 сая, Ард Кредит 54 хувь буюу 1.18 тэрбум төгрөгийг тус тус ногдол ашгаар хуваарилахаар шийдвэрлэлээ.
4 сарын 1	Ард Лайф-д нэмэлт хөрөнгө оруулалт хийв.
4 сарын 27 4 сарын 29 5 сарын 1	Хувьцаа эзэмшигчдийн ээлжит хурлаа анх удаагаа цахимаар амжилттай зохион байгууллаа.
5 сарын 5	АрдКойн Монголын хамгийн анхны олон улсын крипто бирж болох BitMonex-д бүртгэгдлээ.
5 сарын 25	Ирээдүйн Эзэд – Хувьцаатай хүүхэд аян эхэллээ.
6 сарын 10	Ард Менежмент үнэт цаасны компанийн санаачилгаар байгуулагдсан Үндэсний Хувьчлалын Сан Санхүүгийн Зохицуулах Хорооноос зөвшөөрөл авлаа.
6 сарын 11	Хөрөнгө Оруулагч Үндэстэн аяны хүрээнд Европын холбооны улсууд болон 21 аймгаар тойрон мэдээлэл хүргүүлэх сургалт, танилцуулгаа эхлүүллээ.

10 сарын 2	Ард Кредит Монгол Шуудантай хамтарсан ЕвроЖайро олон улсын мөнгөн гуйвуулгын үйлчилгээний нээлтээ хийлээ.
10 сарын 5	Ард Менежмент Үндэсний Хувьчлалын Сан нэртэй Монголын анхны хамтын хөрөнгө оруулалтын сангийн үйл ажиллагааг нээж Монголын Хөрөнгийн Бирж дээр цан цохилоо.
12 сарын 14	Ард Кредит АСН+ (Automated Clearing House) банк хоорондын жижиг төлбөр тооцооны системд нэгдлээ.
12 сарын 16	Торонтогийн Хөрөнгийн Бирж дээр арилжаалагддаг Степ Голд нь Монголын Хөрөнгийн Бирж дээр хувьцаагаа давхар бүртгүүлэхээр болж, андеррайтераар Ард Секюритизийг сонгон ажиллуулахаар болжээ.
12 сарын 26	Крипто Үндэстэн Сан нь үйл ажиллагаа эхлүүлээд 3 жилийн дараа 110 хувийн өгөөжтэй хаагдав.

Хувьцаа эзэмшигчдийн бүтэц



#	Хувьцаа эзэмшигч	2019	Хувь	2020	Хувь
1	Ард Бит	4,243,090	14.8%	3,934,898	13.8%
2	Ард Холдингс Интернэйшнл	2,874,410	10.0%	2,874,410	10.0%
3	Хишигдорж Батхишиг	2,657,214	9.3%	2,657,214	9.3%
4	Бруно Рашле	2,074,922	7.3%	2,098,592	7.3%
5	Ард Лайф	1,365,018	4.8%	1,565,288	5.5%
6	Галням Уянга	1,330,147	4.6%	1,333,147	4.7%
7	Чулуун Ганхуяг	1,239,374	4.3%	1,264,519	4.4%
8	Ард Секюритиз	1,007,392	3.5%	1,033,080	3.6%
9	И Ай Ти	331,253	1.2%	733,349	2.6%
10	Авир Сүхдорж	536,417	1.9%	563,155	2.0%
11	Ронк Лимитэд	479,111	1.7%	479,111	1.7%
12	Сэдбазар Гэрэлтуяа	455,717	1.6%	455,717	1.6%
13	Ард Даатгал	435,362	1.5%	417,905	1.5%
14	Далхаа Отгонбаяр			331,254	1.2%
15	Лхагвасүрэн Соронзонболд	315,069	1.1%	271,542	0.9%
Топ хувьцаа эзэмшигчид		19,368,619	67.7%	20,013,181	69.9%
Бусад хувьцаа эзэмшигчид		7,830,938	27.3%	7,186,376	25.1%
Эргэлтэнд байгаа хувьцаа		27,199,557	95.0%	27,199,557	95.0%
Халаасны хувьцаа		1,414,706	5.0%	1,414,706	5.0%
Нийт гаргасан хувьцаа		28,614,263	100.0%	28,614,263	100.0%
Хувьцаа эзэмшигчдийн тоо		4,063		4,523	



Пүрэвжаргалын Батбаяр
(ТУЗ-ийн дарга, Ард Санхүүгийн Нэгдэл)



Авир Сүхдорж
(БСБ Сервис, ГрэйпСити Монгол, МОСТ Финтек
компаниудын үүсгэн байгуулагч)



Чулууны Ганхуяг
(Гүйцэтгэх захирал, Ард Санхүүгийн Нэгдэл)



Одончимэдийн Одбаяр
(ТУЗ-ийн гишүүн, Ард Даатгал ХК)



Бруно Рашле
(Дэд дарга, Шродер Адвек)



Майнбаяр Тулгат
(Дэд захирал, Хишиг Арвин Индустриал)



Чулууны Мөнхбат
(Ерөнхийлөгч, Саусгоби сэндс)



Арно Вентура
(Удирдах партнер, Гожо энд Компани)



Мөнх-Очирын Сэргэлэн
(Ерөнхийлөгч, Техник Технологийн ДС)



Михаил Зелдович
(Хяналтын зөвлөлийн дарга, Кокуун капитал)

ТУЗ-ийн тайлан



ТУЗ-ийн хурал:

Ээлжит хурал

4

Ээлжит бус хурал

4

Хороодын хурал:

Хөрөнгө оруулалт, санхүү, эрсдлийн хороо

4

Аудитын хороо

4

Засаглал, нэр дэвшүүлэх, цалин урамшууллын хороо

6

Хэлэлцсэн асуудал

69

Гаргасан шийдвэр

34

Хувьцаа эзэмшигчдийн хурал, ногдол ашиг

Ард Санхүүгийн Нэгдэл болон түүний хөрөнгө оруулалттай компаниуд болох Ард Кредит, Ард Даатгалын хувьцаа эзэмшигчдийн ээлжит хурлыг 2020 оны 4 сарын 27, 4 сарын 29, 5 сарын 1-нд цахимаар амжилттай хийсэн. 5 сарын 1-нд Хувьцаа эзэмшигчдийн хурлаа цахимаар хийсэн Ард Санхүүгийн Нэгдлийн хуралд Гүйцэтгэх захирал Ч.Ганхуяг Унгарын Будапешт хотоос оролцсон бөгөөд Ард Санхүүгийн Нэгдэл компанийн ТУЗ-ийн дарга, П.Батбаяр хурлыг даргалав. Тус хуралд нийт 356 хувьцаа эзэмшигч буюу нийт хувьцааны 67.7 хувь нь оролцож, 98.4 хувийн саналаар Ард Санхүүгийн Нэгдлийн 2019 оны санхүү, үйл ажиллагааны тайланг баталсан.

Ард Санхүүгийн Нэгдлийн дүрэмд нэмэлт өөрчлөлт оруулах асуудлаар Хувьцаа эзэмшигчдийн ээлжит бус хурлыг эчнээ санал хураалт байдлаар явуулах тухай шийдвэр гарч, холбогдох зарыг олон нийтэд хүргэсэн бөгөөд уг санал хураалтыг 2020 оны 6 сарын 19-ний өдрөөс 7 сарын

31-ний өдөр хүртэл явуулсан. Хувьцаа эзэмшигчдийн эчнээ санал хураалтад компанийн нийт гаргасан саналын эрхтэй хувьцаа эзэмшигчдээс 59.4 хувийг эзэмшиж байгаа хувьцаа эзэмшигчид саналын хуудсаа ирүүлсэн бөгөөд Ард Санхүүгийн Нэгдлийн дүрэмд оруулах нэмэлт өөрчлөлтийг 100 хувийн саналаар баталсан байна.

Ард Санхүүгийн Нэгдлийн дүрэмд орсон нэмэлт өөрчлөлтөөс дурдвал дүрмийн зүйл заалтын дугаарлалтыг цэгцлэх, Компанийн тухай хуулийн буруу ишлэлийг залруулах, дүрмийн зарим зүйл заалтыг Компанийн тухай хууль болон зохистой засаглалын хэм хэмжээнд нийцүүлэх, утгын алдааг засаж найруулах зэрэг асуудлууд байсан болно.

2020 оны 2 сард Ард Санхүүгийн Нэгдэл ХК-ийн Төлөөлөн Удирдах Зөвлөлийн эчнээ санал хураалтын дагуу компанийн 2019 оны цэвэр ашгийн 18.35 хувь буюу нэгж хувьцаанд 34.95 төгрөг, нийт 1 тэрбум төгрөгийг хувьцаа эзэмшигчдэдээ ногдол

ашгаар хуваарилахаар шийдвэрлэж юм. Уг шийдвэрийн дагуу тухайн бүртгэлийн өдрөөр хувьцаа эзэмшиж байсан нийт 4,234 хувьцаа эзэмшигчдийн ногдол ашгийг 2020 оны 6 сарын 30-ны өдөр Үнэт Цаасны Төвлөрсөн Хадгаламжийн Төвийн дансанд шилжүүлсэн бөгөөд ногдол ашиг хүртэх хувьцаа эзэмшигчдийн дансанд ажлын 3 хоногт багтаан хуваарилсан.

Ард Санхүүгийн Нэгдэл ХК нь нээлттэй хувьцаат компани болсноос хойш эхний жилдээ ТУЗ-ийн хурлаар баталсан Ногдол ашгийн бодлогын дагуу хувьцаа эзэмшигчдэдээ ногдол ашиг тарааж, хувьцаа эзэмшигчдийн өмнө хүлээсэн үүргээ нэр төртэй биелүүлсэн юм.



Удирдлагын баг



Чулууны **ГАНХУЯГ**
Гүйцэтгэх Захирал

Унгарын Будапешт хотын
Корвинус Эдийн Засгийн их сургууль
Санхүүч



Жаргалангийн **АЛТАНГҮНИЙ**
Үйл Ажиллагаа Хариуцсан Захирал

Тайваны Үндэсний
Шинжлэх Ухааны их сургууль
Бизнесийн удирдлагын мастер



Батбилэгийн **ЗОЛБОО**
Санхүү Хариуцсан Захирал

АНУ-ын Нью-Йорк
Мужийн их сургууль
Санхүүч



Энхсайханы **АМАРБАЯСГАЛАН**
Хөрөнгө Оруулалтын Тэргүүн Банкир

АНУ-ын Индиана их сургууль
Бизнесийн удирдлагын мастер



Сүхбаатарын **АНАР-ЭРДЭНЭ**
Хянан Нийцүүлэлт Хариуцсан Захирал

БНХАУ-ын Бээжингийн их сургуулийн
Хууль зүйн сургууль
Эрх зүйч



Мөнхбатын **МӨНХ-ЭРДЭНЭ**
Дотоод Аудитор

Мандах-Бүртгэл их сургууль
Аудитор, Мэргэшсэн нягтлан
бодогч



Цолмонгийн **Бархас**
Маркетинг Хариуцсан Захирал
Ард Холдингс Интернэшнл ХХК-ийн
Гүйцэтгэх Захирал

АНУ-ын Виржиниагийн Олон Улсын
их сургууль
Бизнесийн удирдлага



Баярсайханы **ОЮУТЦЭЦЭН, АССА**
Эрсдэл Хариуцсан Захирал

Их Британийн Лондон хотын
ВРР их сургууль Санхүү, нягтлан бодох
бүртгэлийн мастер



Хангайн **ХУЛАН**
ТУЗ-ийн Нарийн Бичгийн Дарга

БНХАУ-ын Ардын их сургууль
Олон улсын харилцаа

Эдийн засгийн орчин


2020 он дэлхийн нийгэм, эдийн засагт урьд өмнө хэзээ ч үүсч байгаагүй хүндрэл, бэрхшээл, өөрчлөлтийг авчирсан бөгөөд 1980 оноос хойш хоёр дахь удаагаа дэлхийн ДНБ-ий цэвэр өсөлт хасах үзүүлэлттэй буюу 4.4 хувийн уналттай гарлаа. Өмнөх эдийн засгийн хямралын үе буюу 2009 онд 0.1 хувийн цэвэр бууралттай байсан нь энэ удаагийнх хэр ноцтой сөрөг үр дүн үүсгэсэн илтгэнэ. Үүнд нөлөөлсөн хамгийн гол фактор нь COVID-19 цар тахал бөгөөд түүний эхний давалгааны үе буюу оны эхэнд дэлхий даяарх хөл хорио,

хязгаарлалт нь орчин үеийн түүхэн дэх хамгийн эрчтэй эдийн засгийн агшилтыг өдөөсөн юм. Эхний давалгааны дараа ихэнх эдийн засаг огцом сэргэх боломж үүссэн боловч COVID-19-ийн хоёр дахь давалгаа эдийн засгийг буцаан доош татав.

Энэ нь хөгжингүй улс орнуудын эдийн засагт илүү хүндээр нөлөөлсөн бөгөөд тухайн орнуудын дундаж ДНБ-ийн цэвэр бууралт -5.8 хувьтай байгаа бол хөгжиж буй орнуудын хувьд -3.3 хувь байна.

IMF DataMapper

Real GDP growth (Annual percent change, 2020)



COVID-19 цар тахлын үеэр Монголын эдийн засаг мөн адил огцом агшив. Засгийн газар вирус тархалтыг хязгаарлах зорилгын хүрээнд хөл хорио тогтоох, хил хязгаарыг хаах зэрэг арга хэмжээ авч хэрэгжүүлсний үр дүнд 2020 оны 11 сарын дунд хүртэл дотооддоо вирус халдварыг алдаагүй байна. Энэ нь эдийн засагт маш их цочроо өгч, сүүлийн 3 жилийн хугацаанд дунджаар 6 орчим хувиар өсч байсан Монгол Улсын ДНБ 2020 онд 2 хувийн агшив. (1) Засгийн Газрын зүгээс тогтвортой байдлыг хадгалах, нийгмийн эмзэг хэсгийг хамгаалах бодлого чиглэл гаргаж, ДНБ-ий 7.2 хувьтай тэнцэхүйц төсвийн хөшүүргийг хэрэгжүүлэв. Ингэснээр улсын нэгдсэн төсвийн нийт тэнцэл нь 4.5 их наяд төгрөгийн алдагдалд хүрсэн бөгөөд энэ нь ДНБ-ий 12.5 хувьтай тэнцэж байна.

Улсын нэгдсэн төсвийн нийт тэнцвэржүүлсэн орлого, тусламжийн хэмжээ 2020 оны эцэст 9.4 их наяд төгрөг болж, өмнөх оноос 1.5 их наяд буюу 13.6

хувиар буурсан байна. Харин улсын нэгдсэн төсвийн зарлага ба эргэж төлөгдөх цэвэр зээлийн хэмжээ 14.0 их наяд төгрөг болж, өмнөх оноос 2.3 их наяд буюу 19.7 хувиар өссөн байна.

Монгол Улсын нийт гадаад өр жилийн хугацаанд 4.8 хувиар нэмэгдэж 32.2 тэрбум долларт хүрснээр ДНБ-ий 248 хувьтай тэнцэж байна. Харин Засгийн Газрын нийт гадаад өр төлбөр 10.8 хувиар өсч 8.7 тэрбум доллар болсон нь ДНБ-ий 70 орчим хувьтай тэнцэж байна. Энэхүү өрийн өсөлтөд нөлөөлсөн гол хүчин зүйл нь Засгийн Газраас хэрэгжүүлсэн эдийн засгийг дэмжих багц хөтөлбөр байсан бөгөөд түүний эдийн засгийн үржүүлбэр нь өндөр байсангүй.

Инфляцын түвшин 2019 онд 5.2 хувьтай гарч байсан бол 2020 онд 2.3 хувь болтол буурч, өмнөх оны мөн үеэс 2.9 пунктээр буурсан байна.

Монгол Улсыг 2019 оны 10 сард Санхүүгийн арга хэмжээ авах байгууллага (ФАТФ)-ын мөнгө угаах, терроризмыг санхүүжүүлэхтэй тэмцэх стратегийн дутагдалтай улс орнуудын жагсаалт буюу саарал жагсаалтад оруулаад байсан. Жилийн турш мөнгө угаах, терроризмыг санхүүжүүлэхтэй тэмцэх тогтолцоог бэхжүүлэх чиглэлээр салбар бүрт цогц арга хэмжээ авснаар 2020 оны 10 сарын 23-ны өдөр ФАТФ-ын саарал жагсаалтаас гарснаар Монгол Улс бусадтай харьцуулахад хамгийн богино хугацаанд буюу 1 жилийн дотор саарал жагсаалтаас гарлаа.

Монгол Улс 2020 онд нийт 146 улстай худалдаа хийж, гадаад худалдааны нийт эргэлт 12.9 тэрбум доллар, үүнээс экспорт 7.6 тэрбум доллар, импорт 5.3 тэрбум доллар боллоо. Худалдааны нийт эргэлтийн хэмжээ өмнөх оны мөн үес 876.9 сая доллар буюу 6.4 хувиар, экспорт 43.3 сая доллар буюу 0.6 хувиар, импорт 833.6 сая доллар буюу 13.6 хувиар тус тус

буурчээ. Гадаад худалдааны тэнцэл 2019 онд 1.5 тэрбум долларын ашигтай гарсан бол 2020 онд өмнөх оноос 790.3 сая доллароор нэмэгдэж, 2.3 тэрбум долларын ашигтай байна.

Цар тахлын үед авч хэрэгжүүлсэн арга хэмжээнээс гадна гадаад худалдааны дийлэнхийг бүрдүүлэгч уул уурхайн салбар эдийн засагт ихээхэн түлхэц боллоо. Дэлхийн зах зээл дээр алтны үнэ өссөнтэй холбоотой дотоодын алт олборлолт нэмэгдэж, БНХАУ-ын Монголоос худалдан авах нүүрс болон зэсийн эрэлт нэмэгдснээр уул уурхайн салбарын тээвэр, худалдааны салбарт эерэг үр нөлөө гарсан байна. БНХАУ-тай 2020 онд 7.4 тэрбум долларын худалдаа хийсэн нь нийт бараа эргэлтийн 57.5 хувийг эзэлж байгаа бол БНХАУ руу экспортолсон бараа бүтээгдэхүүний 36.6 хувийг чулуун нүүрс, 32.4 хувийг зэсийн баяжмал бүрдүүлж байна.

2020 онд тулгарч буй бэрхшээлийг үл

харгалзан, ашиглагдаагүй байгалийн баялаг болон экспортыг шингээж авах чадвартай, хурдацтай хөгжиж буй хөрш гүрнүүдийн хэрэгцээ, эдийн засгийн нөхцөл байдлыг харгалзан үзвэл дунд хугацааны Монгол Улсын эдийн засгийн төлөв харьцангуй тогтвортой харагдаж байна.

Мөнгө, санхүү

КОВИД-19 цар тахлын үед Монголбанк бодлогын хүүгээ тогтмол бууруулсаар нийт 500 суурь пунктээр бууруулж, 6 хувь болгосон бөгөөд хэрэглээний зээлийн өр ба орлогын харьцааны дээд хязгаарыг нэмж, банкны салбарт зорилтот урт хугацааны санхүүжилт олгожээ. Эдгээр бодлогын шууд арга хэмжээ нь эдийн засгийн сэргэлтийг дэмжиж байна. Мөнгөний нийлүүлэлт (M2) 2020 оны 12 сарын эцэст 24.2 их наяд төгрөг болж, өмнөх оноос 3.3 их наяд төгрөгөөр буюу 16.0 хувиар өсөхөд валютын хадгаламж 1.2 их наяд төгрөгөөр буюу 33.2 хувиар, төгрөгийн хадгаламж 2.2 их наяд

төгрөгөөр буюу 20.1 хувиар өссөн нь нөлөөлжээ.

Санхүүгийн салбарын хувьд Монголбанк түр арга хэмжээ авч, активын ангиллын шаардлагыг зөөлрүүлж, хэрэглээний болон моргежийн (орон сууцны) зээлийн хугацааг сунгах, банкны салбарын бизнесийн зээлийн бүтцэд өөрчлөлт оруулах боломжийг бүрдүүлэв. Эдгээр арга хэмжээ нь зээлдэгчид болон банкуудад үзүүлэх дарамт, ачааг бууруулсан.

Аж ахуйн нэгж, байгууллага, иргэдэд олгосон нийт зээлийн өрийн үлдэгдэл 2020 оны 12 сарын эцэст 17.2 их наяд төгрөг болж, өмнөх оноос 889.2 тэрбум төгрөгөөр буюу 4.9 хувиар буурсан байна. Нийт зээлийн өрийн үлдэгдлийн 8.7 их наяд буюу 50.6 хувь нь иргэдийнх байна. Харин хугацаа хэтэрсэн зээлийн өрийн үлдэгдэл 1.3 их наяд төгрөг болж, өмнөх оноос 445.4 тэрбум төгрөг буюу 54.1 хувиар өссөнөөр нийт зээлийн өрийн үлдэгдлийн 7.4 хувийг эзэлж, өмнөх оноос 2.8 пунктээр өссөн байна. Чанаргүй зээлийн хувьд 2.0 их наяд

төгрөг болсноор өмнөх оноос 184.5 тэрбум төгрөг буюу 10.1 хувиар өсч, нийт зээлийн өрийн үлдэгдлийн 11.7 хувийг эзэлжээ.

Хөрөнгийн зах зээл

2020 оны онцлох өсөлтийг дурьдвал дэлхийн хөрөнгийн зах зээлийг илтгэх MSCI World Index 14 хувиар, алтны ханш 28 хувиар, дэлхийн бондын зах зээлийг илтгэх Barclays Aggregate Bond Index 5 хувиар тус тус өсөв. Ингэснээр дэлхийн хөрөнгийн зах зээл 2 жил дараалан хоёр оронтой өсөлтийг үзүүллээ. Энэхүү өсөлтийн томоохон хэсэг болох технологийн сектор нь мөн адил хоёр жил дараалан хоёр оронтой өсөлт үзүүлсэн бөгөөд 2020 онд 40 хувиар өссөн байна.

Гэсэн хэдий ч 2020 онд хөрөнгийн зах зээлийн бүх сектор өсөөгүй. Жишээлбэл, цар тахлын улмаас дэлхийн эдийн засгийн идэвхжил саарч эрчим хүчний хэрэгцээ буурснаар газрын тосны ханш (WTI crude) 24 хувиар унасан. Мөн КОВИД-19 цар тахал олон тооны бизнесийг сүйрч,

дампуурахад хүргэсэн нь зарим секторын уналтын шалтгаан болов. АНУ-ын хамгийн том 500 компанийн зах зээлийн үнэлгээг илтгэгч S&P 500 индексийн компаниудын хувьд эрчим хүчний салбарын уналт хамгийн их буюу 37 орчим хувийн уналтыг үзүүлэв. Мөн ахуйн, санхүүгийн, үл хөдлөхийн салбар бага зэргийн уналттай байлаа.

АНУ-ын хөрөнгийн зах зээл голлох гурван индекс болох S&P 500, NASDAQ буюу технологийн компаниудын үнэлгээг илтгэх индекс болон Dow Jones Industrial Average (DJIA) буюу хамгийн том 30 компанийн зах зээлийн үнэлгээг илтгэх индексүүд бүгд өсөлттэй байсан. Хамгийн их өсөлтийг цар тахлын үед эрэлт, хэрэгцээ нь нэмэгдсэн технологийн шийдэл боловсруулагч компаниудын үнэлгээ өсч, NASDAQ индекс жилийн хугацаанд 43.4 хувийн өсөлтийг үзүүлжээ.

Европын зах зээлийн хувьд цар тахалтай холбоотой хөл хорио, хязгаарлалт нь зах

зээлд сөргөөр нөлөөлсөн. Лондон (FTSE 100) болон Парисын (CAC 40) хөрөнгийн зах зээлийг илтгэх индексүүд 13.1 хувь болон 6.3 хувийн тус тус уналттай байсан бол цар тахлын эхний давалгаанаас хойш тухайн орнуудын эдийн засаг сэргэхэд хүндрэлтэй байв. Харин Франкфуртын хөрөнгийн зах зээлийг илтгэх DAX 30 индекс нь жилийн 3.5 хувийн өсөлт үзүүлсэн байна.

Ази тивийн хөрөнгийн зах зээлийг илтгэх индексүүд болох Токиогийн NIKKEI болон Шанхайн SSE Composite Index нь 16 хувийн болон 12 хувийн өсөлттэй байсан бол Хонг Конгийн Hang Seng Index (HSI) нь 4 хувийн уналттай гарчээ.



Дэлхий дээрх голлох санхүүгийн төвүүдийг илтгэх индексүүдийн 2020 оны эцсийн хаалтын ханш, жилийн өөрчлөлт болон ханшын график



2020 онд Монгол Улсын хөрөнгийн зах зээл нь мөн адил хөл хорио болон хил хязгаарлалтаас үүдсэн уналттай учирсан ч зах зээл нийтдээ жилийн 12.5 хувийн өсөлтийг үзүүлснээр 5 жил тасралтгүй үргэлжилж буй өсөлтийг хадгалж, нийт зах

зээлийн үнэлгээ 3.3 их наяд төгрөгт хүрч, сүүлийн 5 жилийн хугацаанд нийт үнэлгээ 105.3 хувиар өсөв. Энэхүү өсөлтийг бүрдүүлж буй гол хүчин зүйл нь бол зах зээл дээр шинээр гарч ирж буй үнэт цааснууд юм.

Зах зээлийн үнэлгээ




Ард Менежментын үүсгэн байгуулсан Монголын анхны хаалттай хамтын хөрөнгө оруулалтын сан болох Үндэсний Хувьчлалын Сан нь 2020 оны 10 сарын 5-ны өдөр Монголын Хөрөнгийн Бирж дээр бүртгэгдсэн түүхэн үйл явдал болов.

үнэлгээг илтгэгч ТОП-20 индекс нь жилийн хугацаанд 336.06 нэгжээр буюу 1.7 хувиар буурч, 19,285.80 нэгж болсон байна. MSE А буюу үнэт цаасны I ангиллын индекс болон MSE В буюу үнэт цаасны II ангиллын индексийн хувьд тус тус 4.3 хувь болон 4.7 хувийн уналттай хаагдав.

Харин Монголын хөрөнгийн зах зээлийн хамгийн том 20 компанийн зах зээлийн

Зах зээлийн индекс



Арилжааны идэвхийн хувьд нийт 65.3 тэрбум төгрөгийн арилжаа хийгдсэнээр өмнөх жилийн дүнгээс 54.4 хувиар буурав. Тайлант хугацаанд өдөрт дунджаар 263.4 сая төгрөгийн гүйлгээ хийгдсэн байна. Нийт гүйлгээний үнийн дүнгийн 82.5 хувийг хувьцааны арилжаа, 0.9 хувийг засгийн газрын үнэт цаасны арилжаа, 7.8

хувийг хөрөнгө оруулалтын сангийн нэгж эрхийн арилжаа, 8.9 хувийг компанийн бондын арилжаа тус тус бүрдүүлсэн байна. Хамгийн идэвхитэй арилжигдсан 20 үнэт цаас нь нийт арилжааны 90.2 хувийг эзэлсэн бөгөөд үүнд Ардын хувьцаат компаниуд бүгд багтав.

Түүхий эдийн зах зээл

2020 он түүхий эдийн зах зээлийн хувьд ч мөн тааварлашгүй, тогтворгүй байв. Дэлхийн эдийн засгийн “термометр” гэгдэх газрын тосны фючерс ханш оны хоёрдугаар улиралд буюу КОВИД-19-ийн нөлөөгөөр сөрөг болж, газрын тосны томоохон нийлүүлэгчид болох АНУ болон ОПЕК-ийн улсууд нийлүүлэлтээ танаснаар ханшийг дэмжиж чадсан ч оны туршид цар тахлын өмнөхөөс даруй хоёр дахин бага ханшаар арилжигдсан юм. Монгол Улсын хувьд нийт импортын 20 орчим хувийг нефтийн бүтээгдэхүүн бүрдүүлдэг тул нефтийн ханш буурсан нь гадаад худалдааны тэнцэлд эергээр нөлөөллөө. Харин алтны ханш геополитикийн эрсдэл, эдийн засаг саарах эрсдэл үүсэх үед өсдөг тул цар тахлын нөлөөгөөр оны туршид чангарснаар түүхэн дээд ханш болох 2,067 долларт хүрсэн юм. Ийнхүү дэлхийн зах зээл дээр алтны ханш өсч, хилийн хязгаарлалттай холбоотойгоор хууль бусаар алт хилээр нэвтрүүлэн гаргах тохиолдол буурснаас гадна дотоодод

томоохон алтны үндсэн орд ашиглалтад орсон нь Монголбанкны 2020 оны эцсийн байдлаар худалдан авсан үнэт металлын хэмжээ оны нийт дүнгээр 23.6 тоннд хүрч, өнгөрсөн оны мөн үеэс 8.3 тонноор нэмэгдэж, гадаад валютын нөөц 900 орчим сая доллараар өслөө. Энэ нь түүхэн дэх хамгийн өндөр үзүүлэлт юм.

Зэсийн зах зээлийн хувьд хэдийгээр 2020 оны эхэн үед цар тахлын нөлөөллөөр эрэлт буурах хүлээлт үүсч, ханш огцом унасан боловч нийлүүлэлт талаас хомстолтой, оны сүүлийн хагас жилд дэлхийн нийт зэсийн хэрэглээний 50 хувийг бүрдүүлэгч Хятадын эдийн засаг сэргэсэнээр үнэ ханш нь өдөөгдөж, жилийн хувьд 26 хувийн өсөлт үзүүллээ. Монгол Улсын зэсийн экспорт 2019 онд 1.4 тонн, үнийн дүнгээр 1.8 тэрбум доллар байсан бол 2020 онд 1.36 тонн, үнийн дүнгээр 1.78 тэрбум доллар болов.

Дэлхийн гангийн үйлдвэрлэлийн 50 хувийг Хятад улс хангадаг тул Монгол

Улсын экспортын гол бүтээгдэхүүн болох коксжих нүүрс болон төмрийн хүдрийн ханш нь Хятадын эдийн засаг, улс төр, геополитикийн байдал, дотоодын коксжих нүүрсний нийлүүлэлт, хүчин чадал зэргээс ихээхэн хамаардаг. 2020 оны эхэн үед Хятад улс КОВИД-19 цар тахлын нөлөөгөөр хөл хорио тогтоож, улмаар эдийн засгийн өсөлт нь саарч, коксжих нүүрс болон төмрийн хүдрийн эрэлт буурснаас гадна дэлхийн гангийн эрэлт буурч, үнийн өсөлт саарсан байсан бол оны сүүлийн хагаст Хятадын эдийн засаг сэргэж, дэлхийн гангийн эрэлт аажмаар өсөхийн сацуу бусад гол нийлүүлэгч улсуудын үйлдвэрлэл

буурах хүлээлтээр ханш өсөв. Монгол Улсын хувьд 2019 онд 36.6 сая тонн нүүрс экспортлосон бол 2020 онд 28.7 сая тонныг экспортлож, 21.6 хувийн бууралт үзүүлсэн бол үнийн дүнгээр 2019 онд 3 тэрбум доллар байсан нүүрсний экспорт, 2020 онд 2.1 тэрбум болж, өнгөрсөн оноос 30 хувиар багасав. Төмрийн хүдрийн хувьд 2019 онд 8.5 сая тонныг 576.7 сая доллараар экспортлосон бол 2020 онд 8.2 тонныг экспортлон 640 сая долларын орлоготой байсан нь хэмжээ болон үнийн дүнгийн хувьд 3.5 хувийн бууралт, 11 хувийн өсөлтийг тус тус үзүүллээ.

Монгол Улсын хувьд стратегийн ач холбогдол бүхий түүхий эдийн 2020 оны эцсийн хаалтын ханш, жилийн өөрчлөлт болон ханшийн график:



Валютын зах зээл

2020 онд Монголбанкнаас гадаад валютын албан нөөцийн хэмжээг 4.27 хувиар нэмэгдүүлж 4.5 тэрбум долларт хүргэсэн байна.

Монголбанкнаас зарласан төгрөгийн америк доллартай харьцах сарын дундаж ханш 2020 оны 12 сард 2849.55 төгрөг

болж, өмнөх оны мөн үеэс 4.5 хувиар суларчээ. Мөн төгрөгийн юаньтай харьцах сарын дундаж ханш 2020 оны 12 сард 435.64 төгрөг болж, жилийн хугацаанд 12.1 хувиар суларсан байна. Харин төгрөгийн рубльтэй харьцах сарын дундаж ханш оны эцэст 38.42 төгрөг болж, тайлант хугацаанд 11.4 хувиар чангарсан байна.

Үзүүлэлт	2018.12	2019.12	2020.12
Америк доллар	2,637.35	2,727.34	2,849.55
Жилийн өөрчлөлт	8.4%	3.4%	4.5%
Евро	3,002.43	3,030.51	3,466.18
Жилийн өөрчлөлт	4.3%	0.9%	14.4%
Юань	383.03	388.75	435.64
Жилийн өөрчлөлт	3.8%	1.5%	12.1%
Рубль	39.15	43.38	38.42
Жилийн өөрчлөлт	-5.7%	10.8%	-11.4%

Криптовалютын зах зээл

2020 он нь криптовалютын зах зээлийн хувьд урьд өмнө учирч байгаагүй, таамаглашгүй жил байсан. КОВИД-19 цар тахлаас улбаалсан санхүү, эдийн засгийн уналт крипто зах зээлд их хэмжээний савалгаа үүсгэж байсан ч дэлхий даяарх цахим шилжилттэй холбоотойгоор цар тахлыг үл тоон нийт крипто зах зээлийн үнэлгээ 190.9 тэрбум доллараас 760.7 тэрбум долларт хүрч, 4 дахин өсөв. Цар тахлаас үүдсэн хөрвөх чадварын хямралтай уялдаж 3 сард Биткойн 50 орчим хувиар унасан ч эрчтэй сэргэж,

экспоненциал өсөлтийг үзүүлснээр жилийн хугацаанд 300 хувиар өсөв. 5 сард Биткойн нь үүссэн цагаасаа хойш гурав дахь удаагаа хуваалт хийсэн бөгөөд олборлолтын урамшуулалд өгдөг Биткойны хэмжээ хоёр дахин буурсан юм. Өөрөөр хэлбэл Биткойны инфляци хоёр дахин буурсан байна.



Оны хоёрдугаар хагаст Биткойн нь өдөр бүр түүхэн дээд ханшаа эвдэж байсан бөгөөд энэ бүхэн 8-р сард Microstrategy 250 сая долларын бэлэн мөнгөний нөөцөө Bitcoin болгож байгаагаа зарласнаас эхэлсэн юм. Microstrategy болон Square-ээс гадна бусад

санхүүгийн байгууллагууд криптовалютын зах зээлийг дэмжихээ илэрхийлж эхэлсэн юм. Заримаас нь дурдвал, өмнө нь криптог үл ойшоож байсан Goldman Sachs нь виртуал хөрөнгийн арилжааны албатай болсноо зарласан. Мөн дэлхийн хамгийн том хөрөнгө оруулагчдын нэг болох Fi-

delity нь чинээлэг хөрөнгө оруулагчиддаа зориулан Биткойны хөрөнгө оруулалтын сан үүсгэн байгуулсан бөгөөд харилцагч нартаа хөрөнгө оруулалтын багцынхаа 5 хувийг Биткойн болгохыг зөвлөв.

Сингапурын DBS банк мөн адил өөрсдийн дижитал хөрөнгийн арилжааны бирж байгуулахаа мэдэгдсэн бол Citibank 2021 оны эцэст Биткойныг 300 мянган доллар давах боломжтой гэж таамагласан нь дэлхийг гайхшруулсан.

Хөрөнгө оруулалт хийхээс гадна томоохон санхүүгийн байгууллагууд өөрсдийн үйл ажиллагаандаа криптовалют нэвтрүүлж, харилцагчиддаа санал болгож эхэлсэн. PayPal 10 сард 300 сая хэрэглэгчиддээ шууд криптовалют худалдаж авах боломжийг олгохоо зарласан. Худалдан авалтыг хөнгөвчлөх зорилгоор арилжааны бирж болох Paxos-той хамтран ажилласнаар PayPal-ын хэрэглэгчид хөрөнгөө крипто, ялангуяа Bitcoin руу асар их хэмжээгээр шилжүүлж эхлэв. 2020 онд Decentralized Finance (DeFi)

буюу төвлөрсөн бус, эзэнгүй, олон нийтэд нээлттэй санхүүгийн үйлчилгээ нь зах зээл дээр шинэ боломжийг нээж өгсөн. DeFi-ийн хамгийн хувьсгалт санаа бол yield farming буюу хүү тооцож авах санаа байв. Шинэ протокол, yield farming буюу хүү тооцож авах шинэ төсөл, санаачлагууд долоо хоног бүр зарлагдаж байсантай холбоотой DeFi зах зээлд орсон криптовалютын нийт үнэлгээ 700 сая доллараас 15 тэрбум болж хорин гурав дахин өссөн байна.

DeFi-ийн огцом өсөлт нь дийлэнх криптовалютын суурь болсон Ethereum-ийг өргөтгөх шаардлагатай байгааг харуулав. Учир нь Эфereum дээр гүйлгээ хийхэд маш өндөр зардалтай болж эхэлсэн юм. Иймээс Эфереумын нийгэмлэг, хөгжүүлэгчид системийн шинэчлэл хийж 2.0 хувилбарыг 12 сард нэвтрүүллээ.

2020 оны хамгийн тод хөгжил, дэвшлийн нэг бол Stablecoin буюу фиат мөнгийг шууд илэрхийлэх цахим мөнгөний нийлүүлэлт эрчимтэй нэмэгдсэн явдал юм. Америк долларыг илэрхийлэх Тетер (USDT) 20

тэрбум гаруй долларын нийлүүлэлтийг давснаар 20 тэрбум фиат доллар дижитал хэлбэрт шилжиж Тетер болсон. Жилийн өмнө зах зээлд нийлүүлэх цаг хугацаа нь тодорхойгүй байсан Хятадын дижитал юаний хөгжил 2020 онд хурдацтай ахиж, улс орон даяар туршилтын хөтөлбөрүүдийг эхлүүлэв. Төв банкны цахим мөнгө нь илүү уян хатан, үр ашигтай төлбөрийн системийг бий болгож, уламжлалт банкны бүтцийг түйвээх төлөвтэй байна.



Гүйцэтгэлийн тайлан

Үйл ажиллагааны гүйцэтгэл

2020 онд дэлхий дахинд Ковид-19 цар тахал тархаж, бидний амьдралын хэв маяг, нийгмийн харилцаанд өөрчлөлт орсон онцгой цаг үе байсан хэдий ч Ард Санхүүгийн Нэгдэл болон түүний охин компаниудын хувьд энэхүү нөхцөл байдлыг цахим горимд шилжин, даван туулж, дасан зохицсоноор ажлуудаа амжилттай өрнүүлж чадсан жил байлаа. Тус онд хувьцаа эзэмшигчдийн хурлаа цахимаар зохион байгуулж, Хөрөнгө Оруулагч Үндэстэнг цогцлоох үйл ажиллагааны хүрээнд Европ тив, Монгол орон даяар бүтээгдэхүүн үйлчилгээгээ хүргэж, сургалт танилцуулга хийлээ. Монголын хамгийн анхны хаалттай хөрөнгө оруулалтын сан болох Үндэсний Хувьчлалын Сан IPO хийж, төлөвлөгөөгөө 16.5 хувиар давуулан биелүүлэв. Ард Аппын 4 дэхь шинэ хувилбараа гаргаж, Digital Assets Exchange /DAX/ блокчэйн технологид суурилсан крипто, секюрити токен арилжаалах биржээ олон нийтэд танилцуулж, EuroGi-го мөнгөн гуйвуулгын системд нэгдлээ.

Монгол ТВ-тэй хамтран зохион байгуулсан Аппрентис Монгол Шоу нэвтрүүлэг маань олны хүртээл болж, үзэгч түмний сайшаал магтаал хүртэхийн хажуугаар санхүү, бизнесийн мэдлэг боловсролыг түгээхэд томоохон ач холбогдол бүхий бүтээл болж буйг харилцагч, үзэгчдийн зүгээс илэрхийлж байна. Нийт хувьцаа эзэмшигчид, хамтрагч байгууллагууд, харилцагчдынхаа өмнө хүлээсэн үүрэг хариуцлагаа биелүүлж, маркетингийн үйл ажиллагаагаа цахим орчинд саадгүй явуулж, Ард апп хэрэглэгчдийн тоо 449,122 болж, 202 сая АрдКойн урамшууллаар хэрэглэгчдийн гарт хүрсэн үзүүлэлтэй байна.

Санхүүгийн бүх төрлийн үйлчилгээг цахимаар хурдан шуурхай хүргэх нь бидний зорилготой нийцэхээс гадна сошиал медиа ашиглан цаг алдалгүй мэдээ, мэдээлэл дамжуулахад анхаарав. Жил бүр зохион байгуулдаг хувьцаа эзэмшигчдийн хурал, жилийн тайлан, улирлын тайлангаа эрхэм хувьцаа эзэмшигч, харилцагчдадаа

саадгүй хүргэж ажиллалаа. Хувьцаа эзэмшигч, хөрөнгө оруулагчдадаа зориулсан санхүүгийн мэдлэг түгээх Ард Академи вэбсайтыг идэвхжүүлж, Ard Talk Show-аар 7 хоног бүр санхүүгийн зах зээлийн тойм мэдээг хүргэж байна. Шинэ бүтээгдэхүүн, үйлчилгээгээ Ардын влогоор сурталчлан, урамшуулал олгосон бол цаг үеийн мэдээллээ Facebook Live хэлбэрээр зохион байгуулах зэргээр сошиал медиад зориулсан сонирхолтой бүтээлүүдийг амжилттай гаргаж, олон зуун мянган хэрэглэгчдэд хүргэлээ. Цаашид дижитал маркетингийн үйл ажиллагааг улам нарийн мэргэжлийн, ахисан түвшний хэрэгсэл, нөөц, судалгаа ашиглан явуулах болно.

Он гарахтай зэрэгцэн Монголын Хөрөнгийн Биржийн ТОП-20 индексын сагс шинэчлэгдсэнээр тус индексэд Ард Санхүүгийн Нэгдэл болон түүний хөрөнгө оруулалттай 3 компани багтсан болохыг хувьцаа эзэмшигчдэдээ дуулгаж, таатай мэдээгээр шинэ оноо угтсан билээ.

Тус индекс нь тухайн оны хамгийн их арилжаалагдсан компанийн хувьцааг онцгойлдог үзүүлэлт билээ. Тус санхүү, үйл ажиллагааны тайланг баталлаа. Хувьцаа эзэмшигчид цахимаар анх удаа хуралдаа орж, саналаа өгснийг нь хөндлөнгийн байгууллага баталгаажууллаа.

Ковидын цар тахалтай холбоотойгоор биенесийн үйл ажиллагаа тасалдах эрсдэлтэй энэ үед Ард Санхүүгийн Нэгдэл болон түүний хөрөнгө оруулалттай компаниуд болох Ард Кредит, Ард Даатгалын хувьцаа эзэмшигчдийн ээлжит хурлаараа Ард Кредит 1.8 тэрбум, Ард Даатгал 850 сая, Ард Санхүүгийн Нэгдэл 1 тэрбум төгрөгийн ногдол ашгийг хувьцаа эзэмшигчдэдээ хуваарилахаар шийдвэрлэсэн баяртай мэдээг дуулгаад амжсан юм.

Өмнө жилд Монголын анхны блокчэйн суурилсан харилцагчийн урамшууллын оноо болох АрдКойныг зах зээлд

нэвтрүүлж, хэрэглэгчдийг татах, идэвхжүүлэх зорилгоор тарааж байсан бол энэ жил хэрэглээнд илүү анхаарч Ардкойн зарцуулах, ашиглах зөвлөмжийг маркетингийн төлөвлөгөөнд тусгаж ажилласан билээ. Тухайлбал, Ард Шоп, Ард Лайф компаниуд АрдКойноор төлбөр тооцоо хийх боломжуудыг, харин DAX нь блокчэйн технологид суурилсан крипто, секюрити токен арилжаалах гарцыг нээж өгсөн. Мөн АрдКойн Монголын хамгийн анхны олон улсын крипто бирж болох BitMonex-д бүртгэгдэж тус оны 5 сарын 5-наас арилжаа эхлэн BitMonex биржид бүртгэгдсэнээр Монголчуудын АрдКойн авах зарах сонголтууд нэмэгдсэн юм.

Санхүү бизнесийн салбарт салхи оруулж Монгол Тв-тэй хамтран хийсэн Аппрентис Монгол Шоу нэвтрүүлгийн анхны дугаар 12 дугаар сард цацагдсан билээ. Тус нэвтрүүлэгт Ард Лайф, Ард Апп, Ард Мэнд бүтээгдэхүүн үйлчилгээгээ олон нийтэд таниулах зорилгоор хамтран ажиллах болсон.

Ард Академи - Санхүүгийн мэдлэгийг тогтмол түгээх харилцагч хэрэглэгчдээ мэдээллээр хангах үүднээс 7 хоног бүр хувийн санхүү, хөрөнгө оруулалт болон санхүүтэй холбогддог бусад салбарын мэргэжилтэнээс ярилцлага нийтлэл бэлтгэн хүргэхээс гадна цахим сургалт зохион байгуулдгаараа харилцагчдад хэдийн танил болсон билээ. Одоогийн байдлаар нийт 38 удаа сургалт цахимаар болон танхимаар орж, вэбсайтаа нийт 136 нийтлэл оруулсан байгаа бол уншигчийн зүгээс 125,862 удаа уншихдаа, 2387 цаг зарцуулжээ.

Мөн санхүүгийн мэдлэгийг орон даяар түгээх үүднээс Санхүүгийн ойголтыг 5 минутад 3 өөр мэдлэгийн түвшинтэй хүмүүст тайлбарласан сонирхолтой 10 цуврал дугаар хийж, сошиал сувгуудаар болон Монгол ТВ-ээр түгээсэн байна.

2020 оны томоохон амжилтуудын нэг болох Монголын ахны хамтын хаалттай хөрөнгө оруулалтын сан болох Үндэсний

Хувьчлалын Сан үйл ажиллагаагаа эхлүүлэн 5 тэрбум төгрөг татан төвлөрүүлэх ажлаа амжилттай гүйцэтгэж (Үндэсний Хувьчлалын Сан нь тус бүр 100 төгрөгийн нэрлэсэн үнэтэй 50 сая ширхэг нэгж эрх гаргаж, үүнийхээ 95 хувийг буюу 47 сая 500 мянган ширхэг нэгж эрхийг олон нийтэд санал болгосон юм), захиалга 0.8 тэрбум орчим төгрөгөөр буюу 16.5 хувиар давуулан биелүүлж, нийт 3,272 харилцагч захиалга өгснөөс 2,245 харилцагчийн захиалга биелж, анхдагч арилжааны захиалга хаасан билээ. Хөрөнгө Оруулатын Санг олон нийтэд хүргэх мэдээллээр хангаж, маркетинг идэвхжүүлэлтийн арга хэмжээг амжилттай хийсэн нь татан төвлөрүүлэх хөрөнгөө давуулан биелүүлэхэд ихээхэн түлхэц болж өгсөн билээ.

Хөрөнгө Оруулагч Үндэстэн Хөдөө орон нутаг - Ард Санхүүгийн Нэгдэл болон түүний хөрөнгө оруулалттай компаниудын төлөөлөл зуны 3 сарын туршид Өвөрхангай, Баянхонгор, Дархан-Уул, Орхон, Булган,

Сэлэнгэ, Хөвсгөл, Архангай, Хархорин, Говь-Алтай, Ховд, Баян-Өлгий, Увс, Завхан аймаг, Тосонцэнгэл суманд санхүүгийн боловсрол олгох сургалт, бүтээгдэхүүн үйлчилгээ танилцуулах үйл ажиллагааг амжилттай зохион байгуулсан. Уг үйл ажиллагаанд алслагдмал баг сумдаас зорин ирж сургалтад сууж буй иргэд цөөнгүй байсан нь уг сургалт үр өгөөжтэй байсныг илтгэж байлаа.

Тус арга хэмжээнд Ард Лайф ХХК-ийн Гүйцэтгэх Захирал Б.Гантулга “Тэтгэврийн шинэчлэл, Хувийн тэтгэврийн хуримтлалаа хэрхэн бүрдүүлэх вэ”, Ард Кредит ХК-ийн Гүйцэтгэх Захирал Г.Тэлмэн “Санхүүгийн харилцаанд хариуцлагатай оролцох нь”, Ард Актив ХЗХ-ны Гүйцэтгэх Захирал Г.Билгүүн “Хувийн санхүүгээ хэрхэн удирдах вэ”, Ард Санхүүгийн Нэгдэл ХК-ийн Санхүү Хариуцсан Захирал Б.Золбоо “Хувийн санхүүгээ удирдах нь”, Ард Санхүүгийн Нэгдэл ХК-ийн Хөрөнгө Оруулалт Хариуцсан Захирал Э.Амарбаясгалан “Хувьцаа, Бонд,

Тэтгэвэр” сэдвээр тус тус сургалт зохион байгуулж, нийт 1,500 гаруй хүмүүсийг хамруулжээ. Сургалтыг зорин ирсэн хүн бүр 2020 оны цоо шинэ загварын Samsung брэндийн 32 инчийн зурагтын хонжвортой сугалаанд оролцож, азаа сорьсон билээ. Хөрөнгө Оруулагч Үндэстэн Европ - Хилийн чанадад суугаа Монголчууд гадаад гар утасны дугаараараа Ард Аппдаа бүртгүүлэн, хэрэглэгчээр бүртгүүлэх боломжтой болж Ард Санхүүгийн Нэгдлийн Гүйцэтгэх Захирал Ч.Ганхуяг Европын Будапешт, Праг, Вена, Мюнхен, Штутгарт, Берлин хотуудаар, Франц, Швейцар улсуудаар Ардын бүтээгдэхүүн, үйлчилгээний танилцуулга сургалтаа 2020 оны 6 сараас 8 сар хүртэл хийж уг сургалтад 300 гаруй Монголчууд идэвхтэй оролцжээ.

Компанийн цахим шинэ жилийн баяр, тайлангийн хурлын үеэр ажиллагсдын дунд сугалаа явуулж, 3 өрөө байр, цоо шинэ загварын Renault Kaptur автомашин болон бусад ухаалаг электрон бэлгүүдийг гардуулав.



Эрсдэлийн удирдлага

Ард Санхүүгийн Нэгдэл ХК нь удирдлагын баг, Төлөөлөн Удирдах Зөвлөл (ТУЗ), ТУЗ-ийн дэргэдэх Аудитын хороо; Хөрөнгө оруулалт, санхүү, эрсдэлийн хороо; охин компаниудын ТУЗ болон ТУЗ-ийн дэргэдэх хороодоор дамжуулан группын үйл ажиллагаанд учирч болзошгүй гадаад болон дотоод хүчин зүйлсээс шалтгаалах эрсдэлүүдийг эрсдэлийн удирдлагын бодлогын дагуу гол 8 төрлөөр ангилан тэдгээр эрсдэлээс сэргийлж, хариу арга хэмжээг хэрэгжүүлж ажилладаг. Үүнд:

Системийн эрсдэл
Зах зээлийн эрсдэл
Ханшийн эрсдэл
Хүүний түвшний эрсдэл
Хөрөнгө оруулалтын эрсдэл
Зээлийн эрсдэл
Хөрвөх чадварын эрсдэл
Үйл ажиллагааны эрсдэл
Хүний нөөцийн эрсдэл
Мэдээлэл, технологийн эрсдэл
Процесстой холбоотой эрсдэл
Нэр хүндийн эрсдэл
Улс төр, хууль эрх зүйн орчны эрсдэл

Бизнесийн эрсдэл
Системийн эрсдэл байна.

Эрсдэлийн удирдлагын хамгаалалтын гурван түвшинг бүрдүүлснээр бүх түвшний ажилчид өдөр тутмын үйл ажиллагаандаа эрсдэлийн удирдлагыг хэрэгжүүлэх хариуцлагыг хүлээдэг нь нийт хувьцаа эзэмшигчдийн эрх ашгийг хамгаалж, компанийн тогтвортой хөгжлийг хангаж буй явдал юм.

2020 оны туршид ТУЗ нь ээлжит болон ээлжит бусаар хуралдаж, эдийн засаг, хөрөнгийн зах зээлд нөлөөлөх гадаад ба дотоод хүчин зүйлсийг тогтмол хянаж, бизнесийн стратеги төлөвлөлтийг нөхцөл байдалд уялдуулан ажиллалаа. ТУЗ-ийн дэргэдэх Хөрөнгө оруулалт, санхүү, эрсдэлийн хороо нь шинэчилсэн эрсдэлийн бодлого, эрсдэлийг үнэлэх аргачлалууд, мөн шинэчлэн сайжруулсан мөнгө угаахтай холбоотой дотоод хяналтын хөтөлбөрийг баталж, үйл ажиллагаандаа мөрдөн хэрэгжүүлж байна.

2020 он нь КОВИД-19 цар тахлын нөлөөгөөр улс орнуудын төдийгүй эдийн засаг, бизнесийн үйл ажиллагаанд цочир нөлөө үзүүлсэн ба Монгол улсад ч бизнес зогсонги байдалд шилжиж, хөл хорио, хил хязгаарлалттай холбоотойгоор эдийн засаг 2 хувиар агшиж, гадаад өр 4.8 хувиар өсч, төсвийн тэнцэл 4.5 их наяд төгрөгийн алдагдал хүлээлээ. Эдийн засгийг идэвхжүүлэх, тогтвортой байдлыг хамгаалах зорилгоор засгийн газар, төв банк болон бусад зохицуулагч байгууллагууд тухай бүр арга хэмжээ авч байсны адил Ард Санхүүгийн Нэгдэл ч өөрсдийн үйл ажиллагаандаа тогтмол үнэлгээ, шинжилгээ хийж, шинээр үүсч буй нөхцөл байдалд тохирох арга хэмжээг авснаар тулгараад байсан эрсдэлийг бууруулаад зогсохгүй нөхцөл байдлыг боломж болгон эргүүлж чадсан юм.

Бидний цахим шилжилт халдвар хамгааллын дэглэмийг сахихад түлхэц үзүүлэхээс гадна нийгмийн өмнө хүлээсэн үүргээ биелүүлэхэд том түлхэц болсон юм. Бид харилцагчдадаа халдварын эрсдэлд өртөхгүйгээр санхүүгийн бүх үйлчилгээг Ард Аппаараа авах боломжийг олгохын ялдамд харилцагчдын мэдээллийн аюулгүй байдал, цахим аюулгүй байдлыг хангах үүднээс Ард Аппыг тогтмол сайжруулж, хэрэглээг хялбаршуулж ирлээ. Мөн харилцагчдадаа санхүүгийн боловсролыг зайнаас олгох цахим сургалтуудыг тогтмол хийж, харилцагч мэдээллийн дутмаг байдлаас санхүүгийн алдагдалд орох эрсдэлийг бууруулахад анхаарч ажиллав.



 Нээлттэй компани
  Ард Санхүүгийн Нэгдэл
  Холбоотой талууд

Хараат бус аудитын тайлан

Санхүүгийн байдлын тайлан



"ГРАНТ ТОРНТОН АУДИТ" ХХК
Аудит, татвар, зөвлөх үйлчилгээний
дэлхийн сүлжээний бие даасан фирм

Хураангуй санхүүгийн тайлангийн талаарх Хараат бус аудиторын дүгнэлт

Далай түүр 9 даяар, ЮНЕСКО
гудамж, Сүхбаатар дүүрэг, 1-р
короо, Улаанбаатар 14230,
Монгол улс
Т + 976 70 110744
+ 976 70 110799

Dalai Tower, 9 B, UNESCO street,
Sukhbaatar District-1, Ulaanbaatar
14230, Mongolia
T + 976 70 110744
+ 976 70 110799

"Ард санхүүгийн нэгдэл" ХК-ийн хувьцаа эзэмшигчдэд:

Дүгнэлт

Бид "Ард санхүүгийн нэгдэл" ХК-ийн 2020 оны 12 дугаар сарын 31-нээрх санхүүгийн байдлын тайлан, уг өдрөөр дуусгавар болсон жилийн орлогын дэлгэрэнгүй тайлан, өмчийн өөрчлөлтийн тайлан, мөнгөн гүйлгээний тайланг (цаашид хамтад нь "хураангуй санхүүгийн тайлан" гэх) 2020 оны 12 дугаар сарын 31-ний өдрөөр дуусгавар болсон аудитын тайлангаас хураангуйлан авч бэлтгэсэн болно.

Бидний дүгнэлтээр, энэхүү хураангуй санхүүгийн тайлан нь Санхүүгийн тайлагналын олон улсын стандартад нийцүүлэн эрх бүхий байгууллагын баталсан холбогдох дүрэм, журмын дагуу үнэн зөв, бодитой илэрхийлэгдсэн байна.

Хураангуй санхүүгийн тайлан

Энэхүү хураангуй санхүүгийн тайлан нь Санхүүгийн тайлагналын олон улсын стандартаар шаардсан бусад тайлбар тодруулгуудыг иж бүрэн агуулаагүй тул "Ард санхүүгийн нэгдэл" ХК-ийн аудитын тайлан бүрэн дүрэн орлохгүй болно.

Энэхүү хураангуй санхүүгийн тайланд 2021 оны 3 дугаар сарын 31-ны өдрийн манай аудитын тайлангийн дүгнэлттэй ижил дүгнэлт илэрхийлсэн бөгөөд эдгээр санхүүгийн тайлан болон хураангуй санхүүгийн тайланд манай аудитын тайлангийн өдрөөс хойш балансын дараах үйл явдлын нөлөөллийг тусгаагүй.

Аудитлагдсан санхүүгийн тайлан ба түүнд өгсөн бидний дүгнэлт

Бид аудитлагдсан санхүүгийн тайланд зөрчилгүй дүгнэлт өгсөн. Бидний мэргэжлийн үнэлэмжээр аудитын гол асуудалд СТОУС 9 "Санхүүгийн хэрэглүүр"-т өмчийн хэрэглүүрт оруулсан хөрөнгө оруулалтын хүлээн зөвшөөрөлт, хэмжилт, Виртуал хөрөнгийн бүртгэл, СТОУС 16 "Түрээс"-тэй холбоотой ашиглах эрхтэй хөрөнгө болон түрээсийн өр төлбөрийг хүлээн зөвшөөрөлт, СТОУС 10 "Нэгтгэсэн санхүүгийн тайлан"-д заагдсан хөрөнгө оруулалтын аж ахуйн нэгжийн статусыг хангах тухай зэрэг асуудлуудыг авч үзсэн.

Удирдлага болон Засаглах эрх мэдэл бүхий этгээдүүдийн Санхүүгийн тайланд хүлээх үүрэг хариуцлага

Компанийн удирдлага нь эдгээр санхүүгийн тайлангуудыг Санхүүгийн тайлагналын олон улсын стандартад нийцүүлэн эрх бүхий байгуулсан баталсан холбогдох дүрэм, журмын дагуу бэлтгэж, үнэн зөв толилуулах үүрэгтэй.

Аудиторын үүрэг хариуцлага

Бидний үүрэг хариуцлага бол Аудитын олон улсын стандарт, Монгол улсын "Аудитын тухай" хуулийн дагуу хийсэн аудитдаа үндэслэн энэхүү санхүүгийн тайлангуудын талаар хараат бус дүгнэлт өгөх явдал юм.



Б.О. БАТРАВАЙ Т. ТОРНТОН
АУДИТ ХХК
Монгол улс, Улаанбаатар хот
2021 оны 3 дугаар сарын 31
1118276081 • 2577542

www.grantthornton.mn

Мянган төгрөгөөр	2020 оны 12 сарын 31	2019 оны 12 сарын 31
Хөрөнгө		
Эргэлтийн хөрөнгө		
Мөнгө, түүнтэй адилтгах хөрөнгө	100,958	43,236
Дансны болон бусад авлага	1,685,343	4,912,768
Бусад санхүүгийн хөрөнгө	18,737	416,506
Бараа материал	2,112	6,231
Урьдчилж төлсөн зардал/тооцоо	1,243,564	551,327
Эргэлтийн хөрөнгийн дүн	3,050,714	5,930,068
Эргэлтийн бус хөрөнгө		
Үндсэн хөрөнгө	466,025	642,006
Биет бус хөрөнгө	8,941,367	3,261,572
Ашиглах эрхтэй хөрөнгө	440,433	-
Урт хугацаат хөрөнгө оруулалт	67,481,313	68,238,169
Эргэлтийн бус хөрөнгийн дүн	77,329,138	72,141,747
Нийт хөрөнгө	80,379,852	78,071,815
Өр төлбөр ба эздийн өмч		
Өр төлбөр		
Богино хугацаат өр төлбөр		
Дансны болон бусад өглөг	4,552,360	2,613,677
Богино хугацаат зээл	1,147,287	1,082,465
Богино хугацаат хаалттай бондын өр төлбөр	11,958,106	-
Богино хугацаат санхүүгийн түрээсийн өглөг	349,718	40,096
Богино хугацаат өр төлбөрийн дүн	18,007,471	3,736,238
Урт хугацаат өр төлбөр		
Хойшлогдсон татварын өр	3,405,208	3,070,863
Урт хугацаат санхүүгийн түрээсийн өглөг	379,093	262,390
Урт хугацаат зээл	408,752	2,236,039
Урт хугацаат хаалттай бондын өр төлбөр	2,347,232	12,183,955
Урт хугацаат өр төлбөрийн дүн	6,540,285	17,753,247
Өр төлбөрийн нийт дүн	24,547,756	21,489,485
Эздийн өмч		
Өмч-хувьцаат	28,590,335	28,590,335
Халаасны хувьцаа	(1,414,706)	(1,414,706)
Дахин үнэлгээний нөөц	27,284,096	24,105,478
Эздийн өмчийн бусад хэсэг	13,799	13,799
Хуримтлагдсан ашиг	1,358,572	5,287,424
Эздийн өмчийн дүн	55,832,096	56,582,330
Өр төлбөр ба эздийн өмчийн дүн	80,379,852	78,071,815

Тодруулга: "Ард санхүүгийн нэгдэл" ХК-ийн энэхүү хураангуй санхүүгийн тайланг Санхүүгийн Тайлагналын Олон Улсын стандартад нийцүүлэн бэлтгэсэн санхүүгийн байдлын тайлан болон орлогын дэлгэрэнгүй тайлангаас ямар нэгэн зөрүүгүйгээр хураангуйлан бэлтгэсэн болно.

Орлогын дэлгэрэнгүй тайлан

Мянган төгрөгөөр	2020	2019
Хөрөнгө оруулалтын менежментийн үйлчилгээний орлого	688,461	346,333
Хөрөнгө оруулалт борлуулснаас үүссэн олз	303,915	879,944
Ногдол ашгийн орлого	1,311,736	537,157
Хөрөнгө оруулалтын багцын хүүний орлого	29,984	302,225
Нийт хөрөнгө оруулалтын орлого	2,334,096	2,065,659
Бусад орлого	916,740	788,556
Борлуулалт, маркетингийн зардал	271,381	1,625,924
Ерөнхий ба удирдлагын зардал	3,183,791	3,293,038
Санхүүгийн зардал	2,876,353	1,476,353
Бусад зардал	785,887	896,380
Гадаад валютын ханшийн зөрүүний гарз	(170,140)	(20,036)
Үндсэн хөрөнгө данснаас хассаны гарз	-	(34,430)
Татвар төлөхийн өмнөх ашиг (алдагдал)	(4,036,716)	(4,491,946)
Орлогын татварын зардал (өгөөж)	(2,041)	84,204
Тайлант үеийн цэвэр ашиг (алдагдал)	(4,034,675)	(4,576,150)
Бусад дэлгэрэнгүй орлого		
Хөрөнгө оруулалтын үнэлгээний нөөц	385,328	9,348,676
Виртуал хөрөнгийн үнэлгээний нөөц	3,849,693	675,736
Бусад дэлгэрэнгүй орлогын дүн	4,235,021	10,024,412
Нийт дэлгэрэнгүй орлогын дүн	200,346	5,448,262
Нэгж хувьцаанд ногдох суурь ашиг (алдагдал)	(0.15)	(0.21)

